

PRAVILA KONKURSA “RIJEČIMA UPOZORIŠ, DA SPASIŠ OKOLIŠ”

1. ORGANIZATOR

Konkurs “RIJEČIMA UPOZORIŠ, DA SPASIŠ OKOLIŠ” organizuje i provodi Razvojni program Ujedinjenih nacija (UNDP) u BiH, u okviru projekta „Povećanje ulaganja u javne objekte sa niskom stopom emisije ugljika u Bosni i Hercegovini“, koji za cilj ima pružiti podršku naporima Bosne i Hercegovine da odgovori na izazove klimatskih promjena i smanji emisije stakleničkih gasova. Projekt finansira Zeleni klimatski fond (GCF).

2. PODRUČJE ORGANIZACIJE I PROVOĐENJA KONKURSA

Konkurs se organizuje i provodi na području Bosne i Hercegovine.

3. KONCEPT KONKURSA

Konkurs se zasniva na natjecanju novinara, urednika i blogera, koji ispunjavaju osnovne uslove propisane ovim pravilima, u pisanju tekstova o temama:

- klimatske krize uzrokovane povećanim emisijama stakleničkih plinova
- klimatskim akcijama koje se poduzimaju u opštinama da se smanje emisije CO₂
- važnosti uštede energije
- sporazum gradonačelnika za klimu i energiju
- zaštite okoliša
- ulaganja u zelenu ekonomiju

Svi prijavljeni tekstovi će biti analizirani od strane organizatora, kako bi osigurali ispunjenje kriterija prijave.

4. PRAVO NA UČEŠĆE

U konkursu mogu učestvovati sva fizička lica starija od 18 godina, sa prebivalištem na području Bosne i Hercegovine, koja zadovoljavaju kriterije postavljene ovim pravilima, a koja se u periodu od 22.04.2021. godine do 31.05.2021. godine registruju putem aplikacije na web stranici www.spasisokolis.ba i objave svoj natjecateljski tekst, te popratnu fotografiju koja služi za vizualno predstavljanje teksta. Pravo na učešće nemaju lica zaposlena kod organizatora, niti lica koja direktno učestvuju u ovom konkursu. U konkursu ne mogu učestvovati niti lica zaposlena kod neovisnih partnera, u reklamnim agencijama uključenim u ovu promociju, kao i najbliži članovi porodice bilo koje od navedenih osoba. Svaki učesnik može učestvovati u konkursu samo u svoje lično ime i sa učestvovanjem potvrđuje da su svi poslani lični podaci samo njegovi lični podaci, te se slaže sa ovim pravilima. Učesnici nisu ograničeni brojem učestvovanja, ali mogu dobiti samo jednu nagradu.

Učesnici se obavezuju da će navesti sve podatke koji su predviđeni registracijskom formom na web stranici organizatora, a organizator da će te podatke koristiti isključivo u svrhu organizacije konkursa. Sa učestvovanjem u konkursu na web stranici Organizatora, tj. sa objavom teksta i fotografije, slanjem traženih podataka i klikom na dugme “Prijavi priču”, učesnici potvrđuju da su upoznati sa pravilima konkursa, te da ih prihvataju i da se u potpunosti sa njima slažu.

5. NAČIN UČEŠĆA

Učesnici mogu učestvovati u konkursu putem web platforme, na kojoj se nalazi registracijska forma za unos teksta i prateće fotografije, kako je propisano ovim pravilima. Svi učesnici će moći podijeliti svoj rad putem društvenih mreža. Prilikom dijeljenja sadržaja na društvene mreže, učesnici su obavezni stavljati predviđeni hashtag projekta, #LowCarbon.

6. TRAJANJE KONKURSA

Konkurs traje **od 22.04. do 31.05.2021.** godine, u sljedećim fazama.

- Prijava tekstova konkursa na www.spasiokolis.ba: **22.04. do 31.05.2021.**
- Glasanje žirija: **31.05.-02.06.2021.**
- Proglašenje 3 najbolja teksta konkursa: **05.06.2021.**

7. ODABIR POBJEDNIKA

Izbor pobjednika odredit će peteročlani žiri, u periodu od 31.05. do 02.06.2021. godine.

Žiri će bodovati radove na skali od 0 do 10 bodova, na osnovu sljedećih kriterija:

- **Originalnost:** priča predstavlja inovativan i neobičan način razmišljanja (do 10 bodova).
- **Relevantnost informacija u odnosu na temu:** koliko su kontekst i tema priče relevantni u odnosu na zadane teme: klimatske krize uzrokovane povećanim emisijama stakleničkih plinova, klimatskim akcijama koje se poduzimaju u opštinama da se smanje emisije CO₂, važnosti uštede energije, sporazum gradonačelnika za klimu i energiju, zaštite okoliša, ulaganja u zelenu ekonomiju (do 10 bodova).
- **Promjena ponašanja:** priča koja potiče pozitivne promjene u ponašanju (do 10 bodova).

Maksimalan broj bodova koje natjecateljski rad može dobiti u sklopu iznad navedenih kriterija iznosi **150 bodova.**

Pobjednici će biti objavljeni 05.06.2021.godine na istoj web platformi na kojoj su priče objavljene (www.spasiokolis.ba), kao i na stranicama društvenih mreža organizatora.

Rezultati izbora žirija su konačni. Žalba na rezultate nije moguća.

8. OBAVEZE I PRAVA

- Učešćem u konkursu učesnici prihvataju navedena zvanična pravila.
- Odluke organizatora donesene prema pravilima o provođenju konkursa konačne su i obavezujuće za sve učesnike.
- Učešćem u konkursu učesnici garantuju, pod punom moralnom i materijalnom odgovornošću, da polažu autorska prava na tekstove i fotografije sa kojima učestvuju u konkursu. Svaki učesnik sa prijavom priče u potpunosti garantuje da je tekst isključivo i samo njegovo autorsko djelo, a u slučaju fotografije da je za istu obezbijedio puna autorska prava, te na organizatora prenosi sva materijalna autorska prava, bez vremenskog i teritorijalnog ograničenja.
- Učesnici garantuju da su obezbijedili autorska prava za sve fotografije koje se prijave uz tekst, kao prateći materijal. U slučaju da su učesnici kreirali vlastite fotografije, njihovim slanjem uz tekst, garantuju da imaju odobrenje i saglasnost od svih osoba koje se nalaze na fotografiji.

- Zabranjeno je uz tekst slati fotografije na kojima se nalaze maloljetne osobe, ukoliko nije osigurano odobrenje roditelja/staratelja.
- Svi tekstovi koji su objavljeni u okviru konkursa, ostaju u vlasništvu organizatora, koji ih može koristiti promotivne svrhe bez isplate dodatne naknade.
- Učešćem u konkursu prepušta se pravo organizatoru da koristi, objavljuje i distribuira, širom svijeta i trajno, u svakom tradicionalnom ili elektronskom medijskom formatu, tekstove koji su objavljeni.
- Zabranjeno je:
 - o objavljevati i/ili prenositi zakonom zaštićene sadržaje.
 - o objavljevati i/ili slati vulgarne, klevetničke, pornografske, uvredljive, prijeteće, rasističke, fašističke i šovinističke sadržaje tekstove, slike, video i/ili audio zapise;
 - o objavljevati i/ili slati tajne i/ili zaštićene podatke neke fizičke ili pravne osobe; lažno se predstavljati (u ime druge fizičke ili pravne osobe);
 - o objavljevati, prenositi i/ili slati informacije koje krše postojeće zakone Bosne i Hercegovine i/ili međunarodne zakone;
 - o objavljevati, prenositi i/ili slati lažne informacije u smislu nanošenja štete trećim osobama; širiti nacionalnu netrpeljivost ili vrijeđati građane Bosne i Hercegovine ili bilo koje druge zemlje po nacionalnom ili bilo kojem drugom osnovu;
- Organizator se obavezuje da neće prodavati tekstove ni pod kojim uslovima.
- Sve poslane datoteke (fotografije i tekstove) organizator može koristiti u bilo kojem obliku svojih promotivnih aktivnosti, bez posebnog obavještenja ili dodatne saglasnosti učesnika.
- Organizator zadržava pravo oduzimanja nagrade, u slučaju otkrivenih nepravilnosti ili netačnosti podataka, a učesnik da će nadoknaditi materijalnu štetu nastalu tim postupkom.
- Organizator ne odgovara za eventualno kršenje autorskih prava od strane učesnika.
- Dobitnici nagrada pružit će sve informacije i dokumente potrebne za primjenu pravila i ostalih odgovarajućih zakona.

Ako dobitnik ne ispunjava uslove za preuzimanje nagrade definisane ovim pravilima, odnosno odustane od preuzimanja nagrade ili istu ne preuzme u roku određenom od strane organizatora, organizator i tehnički izvođač u odnosu s dobitnikom se oslobađaju svih obaveza prema dobitniku. Ukoliko dobitnik unutar 72 sata od eventualnog naknadnog poziva ne dostavi svoje podatke, nagrada mu neće biti dodijeljena.

9. NAGRADNI FOND

Ukupni nagradni fond za ovu ovaj nagradni konkurs iznosi **2.000,00 KM**.

Nagradni fond će biti raspodijeljen pobjednicima, prema sljedećem rangiranju:

Opis nagrade	Količina	Vrijednost
novčana nagrada za 1.mjesto	1	1.000,00 KM
novčana nagrada za 2.mjesto	1	600,00 KM
novčana nagrada za 3.mjesto	1	400,00 KM

Nije moguće prenositi osvojenu nagradu na treća lica. Broj nagrada je ograničen i ni u kojem slučaju neće biti dodijeljeno više nagrada nego što je predviđeno ovim pravilima.

10. OBJAVA PRAVILA

Ova pravila će biti objavljena na web stranici organizatora.

11. OBAVJEŠTAVANJE DOBITNIKA I URUČENJE NAGRADA

Imena dobitnika i načini uručenja nagrada će biti objavljeni na web stranici www.spasiokolis.ba. Dobitnici će biti obaviješteni o prijemu nagrade putem elektronske pošte na e-mail adresu navedenu od strane učesnika prilikom registracije, i to u roku od pet dana od dana odabira.

Dobitnik je dužan da prilikom preuzimanja nagrade organizatoru konkursa dostavi svoje lične podatke (ime, prezime, adresu, opštinu stanovanja, broj telefona, matični broj, broj lične karte, te broj računa za uplatu novčane nagrade).

U slučaju da epidemiološka situacija u Bosni i Hercegovini bude dozvoljavala, dodjela nagrada će se održati u prostorijama UN House Sarajevo.

11. ISKLJUČENJE ODGOVORNOSTI

Organizator ne preuzima nikakvu odgovornost za:

- slučaj nepravilnog funkcionisanja interneta, (ne)funkcionisanja i ostalih aktivnosti društvene mreže Facebook ili (ne)funkcionisanja elektronske pošte ili ostalih uređaja koji omogućavaju sprovođenje ovog konkursa. Isto tako, organizator nije odgovoran ako jedan ili više učesnika ne mogu pristupiti web stranici ili ne mogu da učestvuju u konkursu zbog tehničke greške u vezi sa djelovanjem internet mreže
- slučaj bilo kakve posljedice koje učesnici mogu pretrpjeti zbog učestvovanja u konkursu na koje organizator i tehnički izvođač nemaju uticaja.

12. OTKAZIVANJE

Organizator ima pravo da jednostrano otkáže konkurs u bilo kojoj fazi, uz obavještenje ukoliko bi došlo do materijalne povrede ili zloupotrebe pravila ili događaja koji imaju karakter više sile. Ukoliko bi nastala neka od navedenih okolnosti, izvlačenje i distribucija nagrada će biti odmah obustavljeni jednostranom odlukom organizatora, neovisno o potrebi za njenim eventualnim objavljivanjem. U tom slučaju neće se nadoknaditi troškovi, direktna ili indirektna šteta učesnicima u nagradnom konkursu, niti će se nagradni konkurs održati. Opoziv konkursa se objavljuje na web stranici www.spasiokolis.ba.

13.OSTALE ODREDBE

Organizator neće uvažiti zakašnjele, nepotpune ili pogrešno ispunjene prijave za konkurs. Odluke organizatora konkursa, za sva pitanja vezana uz konkurs, su konačne i vrijede za sve učesnike. Organizator konkursa zadržava pravo izmjena ovih pravila ako to zahtijevaju pravni ili tehnički razlozi. O svim eventualnim promjenama pravila učesnici će biti obaviješteni objavom na internet portalu www.spasiokolis.ba.

Nastavak učestvovanja u konkursu, nakon objave eventualnih promjena pravila, znači da učesnik prihvata i slaže se s promjenama.